

**Her mr auf - SCHALLUH (K/T: S. Schwenk - 2023)**

S'gibt so Däg, do hot mr auf gar nix Luscht  
Do kennt mr ständig blos onetriala  
i schiab no au koin Riesafruscht  
S'gibt Doch eh nix zu verliera

No stragg I dui ganza Zeit en mei Bett  
dät mi am liabschta blos verstegga  
Ond wehe no isch no jemand zu mir nett  
Der ko mi kreizweiß am Arschlegga

Aber Leit ihr hen koin blassa  
manchmol ko mr nex drfür  
Do muss mr, sich au mol ganga lassa  
Doch No sag I zu mir

**Her mr auf, her mr auf, her mr auf**  
**Jetzt reiß di mol am Reama**  
**Bisch net guat drauf, net guat drauf, net guat drauf**  
**So ko mr sich doch net benehma**

**Her mr auf, her mr auf, her mr auf**  
**Haidanei des isch doch kagge**  
**Sei mol guat drauf, mol guat drauf, mol guat drauf**  
**Ond her auf - mit dem romgestragge - mit dem romgestragge**

S'gibt so Däg, do will mr au mol sei Ruah  
Ond net emmer blos romhudla (net emmer blos romhudla)  
scheißegal, wenn i mol gar nix duah  
Send doch blos a baar Minuta

Der ganze Lombagruschd ko liegableiba  
Ond des ganze Glomb  
I kennt allaweil vor mi Oneschweiga  
I breng dr Dag scho rom

Aber Leit ihr hen koin blassa  
manchmol ko mr nex drfür  
Do muss mr sich au mol ganga lassa  
Doch No sag I zu mir

**Her mr auf, her mr auf, her mr auf (Uuuh)**  
**Jetzt reiß di mol am Reama**  
**Bisch net guat drauf, net guat drauf, net guat drauf (Uuuh)**  
**So ko mr sich doch net benehma**

**Her mr auf, her mr auf, her mr auf (Uuuh)**  
**Haidanei des isch doch kagge**  
**Sei mol guat drauf, mol guat drauf, mol guat drauf**  
**Ond her auf - mit dem romgestragge - mit dem romgestragge**

Ond wenn merksch du bisch vorm Burnout  
No sot mr ronderfahra  
manchmol gots au auf koi Kuahaut  
No muss mr d'Geduld bewahra

**Her mr auf, her mr auf, her mr auf (Uuuh)**  
**I mach doch ellas richtig**  
**Bisch net guat drauf, net guat drauf, net guat drauf (Uuuh)**  
**No isch des net so wichtig**

**Her mr auf, her mr auf, her mr auf (Uuuh)**  
**Jetzt leg i mi oifach no**  
**Ond verschnauf, ond verschnauf, ond verschnauf**  
**Weil i's heit - net andersch ko - Weil i's heit - net andersch ko**